

Oon Feierdaach dut fehle

Weil joo jetz mett Fronleichnam de letzde Feierdaach voorm 3. Okdower erum ist, wärs Zeit driwwer noochzedenke, ob merr nitt die vier Monat bis doohie meddem zusätzliche Feierdaach e bissi ufflockern kennt.

Wie ich dess moim ahle Kummbeer Schorsch erzählt habb, war der gons Feier unn Flomm. O ja, Honnes, hodder gesaad, awwer was ferr ooner? Mir mache uns emol Gedonke unn wenn merr enn neie Feierdaach gefunne hawwe, donn schreiwe merr onn de Bundespräsident, ob der den nitt ferr gons Deitschlond oifiehrn kennt.

Doo hosde recht, Schorsch, gebb isch ze Antwort, weil su enn Feierdaach alloons ferr Hesse oder Bayern, dess wär joo nix. Also was dut donn doo in Frooch kumme? Was iss su wischdisch, dasses iwverall gefeiert werrn misst?

Moont de Schorsch: De Feierdaach misst aach genutzt werrn kenne, um e paar Veroostaldunge ze mache.

Ach Schorsch, saach isch, koo Veroostaldunge, doo giehn nor e paar Leit hie. Naa, ess misst enn Daach soi, den jeder sozesaache dehoom feiern kennt.

De Schorsch hott sich omm Kobb gekratzt. De erst fällt merr doo enn Bienenadaach oi, weils immer wenischer Biene gewwe dut unn dessdeweese die Kinner nimmi wisse, wie die ausseh. Onn dem Daach kennt merr iwverall enn Obstkuche backe unn wo enn Obstkuche iss, sinn aach Biene.

Isch habb gegrinst. Nitt schlecht, die derrfde donn uffem Kuche erumkrawwele unn derrfde nitt fortgejaachd werrn.

De Schorsch hott genickt. Ja su ebbes in der Art denk isch merr. Odder enn Daach speziell ferr die Veeschel, der Tag der Vögel! Doo kennt merr druff uffmerksam mache, dasses immer wenischer Veeschel gewwe dut. Dess wär aach nitt schlecht, weil nitt nor bei uns in de Bachwisse die Turteldäubscher immer wenischer werrn.

Jetzt habb isch noch mieh gegrinst. Dess iss aach nitt schlecht, enn Veescheldaach. Dess derrft nor nitt falsch verstonne werrn.

Honnes, seet de Schorsch, du bist enn Schleeschdschwätzer, awwer recht hosde, dess kenne merr nitt mache. Awwer jetz fällt merr oi, was merr dem Bundespräsident vorschlaache dun.

Ei was donn?, frooch isch.

Doo seet de Schorsch: Ess dut doch enn Mudderdaach gewwe unn aach enn Vadderdaach unn wer Kinner hott, der hotts gonse Jahr Kinnerdaach. Was fehle dut iss enn Partnerdaach. Nitt jeder hott noch e Mudder odder enn Vadder, awwer fast all die Erwachsene hawwe e Ehefraa oder e Partnerin odder enn Ehemonn odder enn Partner unn ferr die kennt merr su enn Daach oirischde.

Isch habbem uff die Schulter gekloppd. Schorsch, dess iss was. Weil su enn Daach dut fehle. Dass merr mol vunn gons owwe in de Politik dorsch enn extra Feierdaach druff uffmerksam mache dut, dass su vill Männer unn Fraue in de Vereine, in soziale Sache unn aach in de Stadtpolitik, also in jeder Sort Omt, monschmol mieh als zeh Stunn in de Woch ohne Geld ze krieh ebbes mache unn dass dess werklisch nor funktioniert, wenn die Partner mettmache odder dess zumindesdens dulde dun. Unn all die Partner sollt merr onn su emm Daach mett irschend ebbes iwverrasche, mett ebbes was nix kossde dut.

Ewe mett emm Feierdaach unn emm dicke Kuss, seet doo de Schorsch.

Eiern Honnes